

## Ukhuwah Islamiyah

Daripada Abu Hurairah RA katanya, Rasulullah SAW bersabda:

لَا تَحَاسِدُوا، وَلَا تَنَاجَشُوا، وَلَا تَبَاغِضُوا، وَلَا تَدَابَرُوا، وَلَا يَبِيعَ بَعْضُكُمْ عَلَى بَيْعِ بَعْضٍ، وَكُونُوا عِبَادَ اللَّهِ إِخْوَانًا، الْمُسْلِمُ أَخُو الْمُسْلِمِ. لَا يَظْلِمُهُ، وَلَا يَكْذِبُهُ، وَلَا يَحْقِرُهُ، التَّقْوَى هَهْنَا وَيُشِيرُ إِلَى صَدْرِهِ ثَلَاثَ مَرَّاتٍ بِحَسْبِ امْرِئٍ مِنَ الشَّرِّ أَنْ يَحْقِرَ أَخَاهُ الْمُسْلِمَ عَلَى الْمُسْلِمِ حَرَامٌ: دَمُهُ وَمَالُهُ وَعَرْضُهُ

**Maksudnya:** “Jangan kamu dengki mendengki, jangan kamu meminta membeli dengan harga yang tinggi bukan dengan tujuan membelinya, tetapi untuk menipu orang lain dan memudaratkan mereka, jangan kamu benci membenci, jangan kamu belakang membelakangi, jangan kamu menjual di atas jualan orang lain, dan jadilah kamu hamba-hamba Allah yang bersaudara. Seorang mukmin adalah saudara kepada mukmin yang lain. Dia tidak menzalimi saudaranya, tidak membohonginya dan tidak menghينanya. Takwa itu di sini, sambil menunjukkan ke dadanya sebanyak tiga kali. Seseorang itu sudah dianggap berdosa jika dia menghina saudara seIslamnya. Tiap-tiap orang muslim itu di atas saudaranya adalah haram: Darahnya, hartanya dan maruahnyanya.”

Riwayat al-Bukhari (10/496) dan Muslim (4/1983)

## Pedoman dan Iktibar Hadis

Antaranya:

1. Rasulullah SAW tidak hanya memadai dengan menegaskan kepentingan ukhuwah Islamiah sebagai satu syiar semata-mata, bahkan Baginda

melingkunginya dengan perintah dan larangan yang menjadikan ukhuwah sebagai suatu realiti yang dapat dihayati di kalangan individu masyarakat Islam.

2. Hadis ini mengandungi hukum-hukum dan faedah-faedah yang besar untuk mencapai matlamat Islam yang murni dan menjaganya daripada segala kekurangan atau kecacatan supaya kalimah ukhuwah itu tidak dijadikan sebagai slogan laungan manusia dan khayalan mereka sahaja, sedangkan mereka tidak dapat menghayatinya dalam realiti kehidupan. Oleh kerana itu, Imam al-Nawawi berkata dalam kitabnya *al-Azkar* tentang hadis ini: Amat besar manfaatnya dan amat banyak faedahnya.
3. Ibn Hajar al-Haitami berkata: Hadis ini mengandungi banyak faedah, ia menunjukkan kepada keagungan prinsip dan matlamat, bahkan jika diperhatikan maknanya dan fahami maksudnya, ia mengandungi segala hukum Islam yang difahami secara langsung dan tidak langsung. Juga mengandungi segala adab sama ada secara isyarat atau perlaksanaannya.
4. Imam al-Syahid Hasan al-Banna berkata: Persaudaraan yang saya maksudkan ialah hati-hati dan roh-roh dihubungkan dengan ikatan akidah. Akidah adalah hubungan yang paling ampuh dan berharga. Persaudaraan adalah saudara iman dan perpecahan adalah saudara kufur. Kekuatan yang pertama ialah kekuatan perpaduan. Perpaduan tidak akan wujud tanpa kasih sayang. Rasa kasih sayang yang paling rendah ialah berlapang dada (bersikap terbuka) dan paling tinggi ialah mengutamakan orang lain.
5. Saudara yang jujur akan merasakan saudara-saudaranya lebih utama dari dirinya sendiri kerana segala hidupnya bersama mereka. Sedangkan mereka, jika tidak bersamanya akan bersama dengan orang lain. Serigala akan hanya menerkam kambing yang bersendirian. Orang mukmin dengan orang mukmin yang lain umpama bangunan yang saling kuat memperkuat antara satu sama lain.

### Mutiara Hikmah

- ❖ **Pujangga berkata:** Orang yang gila kemenangan supaya orang lain menghormati dan tidak mengkritiknya maka kebanyakan orang seperti itu akan hidup sengsara merana. Bagi orang sepertinya, usaha mendapat penghormatan itu ada di belakang kemunculan nama seseorang dan kemasyhuran adalah musuh dari kebahagiaan.
- ❖ **Pujangga berkata:** Jauhilah orang-orang yang pemistik, kerana jika anda memperlihatkan sekuntum bunga kepadanya maka dia akan memperlihatkan duri-durinya kepada anda. Jika anda memperlihatkan air kepadanya, maka dia akan memberi kotorannya untuk anda, dan jika anda memandang keindahan matahari, maka dia akan mengeluhkan panasnya cahaya matahari.

### Kisah Teladan

Di dalam kitab *Raudhatul Muhibbin wa Nuzhatul Musytaqin*, Imam Ibn Qayyim meriwayatkan, bahawa pada suatu pagi selepas sembahyang Subuh, Umar bin al-Khattab RA mencari-cari Abu Bakar – setiap hari selepas sembahyang Subuh, Umar selalu melihat Abu Bakar RA menuju salah satu sudut kota Madinah – Umar tertanya-tanya apa sebabnya, mengapa Abu Bakar sering keluar?

Pada suatu hari, Umar mengikut Abu Bakar keluar, Abu Bakar terus berjalan, tiba-tiba dia memasuki ke sebuah perkhemahan terpencil di sana. Tatkala Abu Bakar RA keluar, Umar masuk, tiba-tiba di dalam perkhemahan itu dia mendapati ada seorang orang tua dan buta bersama anak-anak kecilnya, maka Umar RA bertanya kepadanya: Wahai hamba Allah, siapakah anda? Orang tua itu menjawab: Saya adalah seorang orang tua yang buta, yang tinggal di perkhemahan ini, bapa kami sudah meninggal dunia dan bersamaku anak-anak perempuan, sementara kami tidak mempunyai pemberi nafkah selain Allah SWT.

Umar bertanya lagi: Siapakah seorang syeikh yang mendatangimu tadi? (orang tua itu belum mengenalinya). Dia menjawab: Syeikh itu tidak saya kenal, setiap

hari dia datang, dia menyapu rumah kami, dia menyediakan makanan untuk kami, dia juga memerah susu untuk kami. Maka Umar RA menangis, lalu dia berkata: Wahai Abu Bakar! Kamu telah menyusahkan para khalifah yang sesudahmu nanti.

Sesungguhnya benar, demi Allah! Abu Bakar telah menyusahkan para khalifah selepasnya sampai hari kiamat kelak dengan ibadah dan hubungan yang berkesinambungan dengan Allah SWT.

